

GANA ANOCHI, PÈRDÈ MAINTA

Rubianonan a celebrá nan dia



Rubianonan bibá na Boneiru a celebrá nan dia djasabra último. Selebrashon a kuminsá mainta tempran manera semper. Tra'i mèrdia tabatin un selebrashon mas den ámbito sosial. Foto ta mustra algun dirigente di e organisashon di rubiano na Boneiru na busto di Betico Croes na Playa djasabra.



CHANGAN AUTO



HUNTER

f /dabboussimotors

xerox™



MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



Demokrat
no ta
negosha
via prensa

M21 ta respetá desishon di pueblo

KRALENDIJK – M21 ta respetá opnion di pueblo. E tim di 22 lider di M21 ta yama un danki di kurason na e 984 voto di konfiansa ku nan a risibí den eleksion di 15 di mart último pa asina nan por kontinuá ku e trabou di representá e pueblo boneriano den Konseho Insular. Na di dos lugá un pabien na partido PDB i partido UPB ku nan adelanto den voto.

“Na partido MPB e señal ta hopi kla, esta ku pueblo no a aprobá e maneho ni di e partido ni di e eks-lider, mirando e pèrdida grandi na voto. Na partido IUPP i partido URB; boso no a alkansá, pero nos di M21 a tuma bon nota di boso mensahe s”, segun un komunikado di M21.

“Pueblo a papia i ounke no tin lei pa esaki, étika polítiko i kustumber ta ku e partido ku a optené mas voto lo mester tuma e iniciativa pa kuminsá ku un tanda di kòmbersashon pa orientá posibilidatnan pa haña un mayoria den konseho insular pa por sostené un Kolegio Ehekutivo. I pa ta fuerte nan lo mester bai pa e sosten mas amplio posibel. Pues ta na Partido Demokrat pa tuma e iniciativa aki”, segun MPB.

M21 ta respetá desishon di pueblo. “Pa loke ta e resultado, nos lo mester sigui ku nos trabou den Konseho Insular i hiba un maneho konstruktivo ku semper e interes general di e komunidad dilanti. Nos lo ta krítiko, nos lo sostené desishonnan na interes general i

nos lo rechasá desishonnan ku ta en kontra di e pueblo su interesnan. Tambe nos lo vigilá di aserka si ta kumpli ku reglanan di bon gobernashon.”

Mas aleu M21 lo bin ku inisiativanan tantu den forma di moshonnan, desishonnan di Raad i tambe inisiativanan di lei, pa asina kontribuí na un gobernashon na nivel pa e isla.

“Nos ròl di kòntrol riba e forma kon gobièrnu ta manehá fondonan i biennan di e isla aki, pero tambe kon nan ta ehekutá e programa di gobernashon, lo ta intensivo. I pa hasi esaki nos tim di lidernan a komprometé nan mes ku nan lo duna frakshon di M21 den Konseho Insular tur sosten. Nos enfoke pa krea un partisipashon aktivo di komunidad den gobernashon di nos isla, lo kontinuá den un forma strukturá i organisá”, segun e komunikado di M21.

“M21 lo sigui konstruí e movimentu riba e fundeshi di e 984 votadó, organisando nos mes muchu mas mihó den tur barío aki na Boneiru ku e fe i speranza ku aki 4 aña, pueblo lo rekompensá nos trabou na su bienestar ainda mas i ku nos lo multipliká e kantidat di voto.

Nos tin un ekipo hóben, i profeshonal, ku hopi energia i amor pa sigui traha i hasi e diferensia den política i gobernashon di nos isla. Si abo tambe ke kontribuí pa yuda hasi e diferensia, aserká i djòin nos ekipo.”



www.islandfinancebonaire.com

E MIHÓ OPSHON NA MOMENTU KU BO MESTER DI SÈN!

Apliká awe mes

Kaya Almirante Pedro Luis Brion #7,
Kralendijk 717-5991

island finance
Nos solo. Siempre. ta bria p'abo!

*SUHETO NA APROBASHON DI KRÉDITO I VERIFIKASHON DI DOKUMENTO.

vacature

Manager Maintenance Airside

De Organisatie

Bonaire International Airport (BIA) is verantwoordelijk voor het beheer en de exploitatie van de luchthaven. BIA staat voor grote uitdagingen in onderhoud, uitbreiding en vervanging van de luchthaven-infrastructuur ten behoeve van de passagiersprocessen en het vliegverkeer. Het bouwen aan de verdere ontwikkeling van de luchthaven maakt het boeiend om bij BIA te werken.

De functie

In deze functie, waarin je leiding geeft aan 8 medewerkers, ben je verantwoordelijk voor zowel gepland als correctief onderhoud. Je vertaalt daartoe wettelijke eisen naar de praktijk, je sluit onderhoudscontracten af en je houdt steeds toezicht op de verrichte werkzaamheden, op zodanige wijze dat de organisatie voldoet aan zowel wettelijke- als operationele kaders en normen. Voor je werk ben je constant in contact met zowel interne als externe partijen. Je functioneert daar waar nodig als 'troubleshooter'. Samen met je collega's van andere afdelingen bepaal je de prioriteiten en stel je voor zowel de korte-, middellange- en langere termijn concrete planningen op. Na goedkeuring van die plannen zorg je voor zowel de uitvoering daarvan, als voor periodieke rapportages over gemaakte vorderingen.

Jouw profiel

Je hebt een opleiding op HBO-niveau in de civiele richting of techniek. Daarnaast beschik je over meer dan vijf jaar werkervaring op de eilanden, bij voorkeur binnen de luchtvaart. Ook heb je zonder meer de nodige leidinggevende ervaring. Je bent niet alleen technisch en inhoudelijk sterk, maar beschikt net zo goed over uitstekende 'people skills', waardoor je zowel je eigen medewerkers als contractpartijen weet te motiveren tot een optimale inzet en prestatie. Je hebt bij voorkeur een goede beheersing van het Papiamentu, maar ook van het Nederlands en Engels. Gezien het feit dat BIA een operatie is die 7 dagen per week draait, ben je waar nodig ook bereid tot inzet gedurende de weekeinden en -in geval van nood- en daar waar nodig- ook in de avonden.



Jouw reactie

Spreekt deze rol jou aan?
Stuur dan een brief met CV
vóór 30 maart 2023 aan:
Linkels & Partners
T.a.v. drs. Harald Linkels
via mail: harald@linkels.com

Een psychologisch assessment kan deel uitmaken van de selectie procedure.

Linkels & Partners



**AKI TA TRAHA I DRECHA PLANCHA PA DJIENTE.
BO TA WARDA MIENTRAS NAN TA DRECHE,
SERVISIO RAPIDO.**

djaluna pa djaweps: 9'or mainta pa 12'or merdia,
2'or te 4'or di atardi.

djabieme: 9'or mainta pa 12'or merdia,
atardi ta SERA.

E.M. Rijswijk

**Por yama pa un sita na tel. 717-2248 òf selular 796-3714
Kaya Dr. J.G. Hernandez s/n (banda di Botica Korona)**

GANA ANOCHI, PÈRDÈ MAINTA

KRALENDIJK- E konsepto gana anochi, pèrdè mainta ta un menasa real pa Partido Demokratiko Boneriano (Demokrat). Djárasen 15 di mart Demokrat a bira e ganadó indiskutibel di eleksion Konseho Insular. Na promé instante a konta ku Demokrat a haña un total di 4002 voto. Despues a ahustá esaki na e kantidat di 3978 voto, ekivalente na 3 asiento.

E kuater partidonan aki a saka asiento. Demokrat 3 asiento, 3 asiento pa UPB, MPB 2 i M21 a haña 1 asiento. Por konklui ku Demokrat ta e partido yamá pa forma koalishon i ya tin kòmbersashonnan ta andando na e momentunan aki. Demokrat a forma un delegashon ku ta atendé ku esaki. Nan ta bisa ku meta

di e kòmbersashonnan aki ta pa interkambiá ku otro e diferente opinionnan ku por tin pa ku próksimo pasonan den formashon di un gobièrnu. Tambe pa determiná kua mayoria di asiento den Konseho Insular nobo por forma un base stabil di gobernashon ehekutivo nobo, un gobernashon ku ta honra e deseonan ku pueblo a ekspresá na urna.

Rekonteo

Demokrat ta pidi rekonto di tur voto. Nan a manda un karta pa e presidente di Konseho Supremo Elektoral ku e petishon pa konta tur voto di nobo. Enfatisando e kantidat di voto blanku i voto inbálido. Tambe nan ke informashon tokante e kantidat di vòlmagt ku a usa. Ta opvio ku e partido ta kuestioná resultado di

eleksion. Segun Demokrat e konteo ta muestra un diskrepansia ku por tin influensia riba repartishon di asiento.

Kiko pueblo ke?

Na momentu ku a bin den publisidat posibel kolaborashon entre UPB i MPB a surgi basta diskushon riba medio sosial. Hopi hende a ekspresá un desaprobashon bisando ku pueblo a demonstrá e nesesidat pa bin un kambio den gobernashon. UPB a reashoná pa medio di un komunikado di prensa ku esaki ta kuadra. “Ningun Partido no a haña mayoria absoluto pues e gritu di kambio no ta fundá i ta trese bruashon den nos komunidad”, segun nan komunikado.

UPB ta splika e echo ku Demokrat ta pidi rekonto

di voto, lo stanka e proseso pa forma koalishon.

“E ponensia aki ta trese kuné ku no tin sentido pa sinta ku partido Demokrat

na e momentonan aki, pasobra nan tin otro repartishon di asiento den mente”, UPB ta akclará.

Zhung Kong B.V.

ta buska

- 3 kòki

- mester tin eksperiensia i V.O.G.

Inf. tel. nr **717-6688**

INVITASHON

Señor ta mi wardador, mi no tin falta di nada.

Yunan, kasá i nietunan di

Headworld Cornelio

Emerenciana

mihó konosi komo “Wotty”



Pa rekordá 6 luna di partida i sosiego eterno di alma di nos tata nos ta invitá na un santu sakrifisio di misa pa nos defuntu stimá **awe djaluna 20 maart na parokia San Bernardo na Playa pa 7’or anochi.**

Aseptá esaki komo un invitashon personal.

Demokrat no ta negoshá via prensa

KRALENDIJK - Komishon di Informadó di Demokrat a tuma nota di vários notisia sirkulando f’e dia despues di eleksion te awor, ku MPB ku UPB ta hibando kombersashon mutuo kaba pa yega na kontinuashon di e koalishon anterior.

Komishon di Informadó di Demokrat ta poko sorprendé ku vários persona ta preferá negoshá via prensa, en bes di sigui un proseso transparente i strukturá pa nos yega na un gobièrnu

stabil i duradero.

“Demokrat, komo partido ku pueblo, a skohe pa inisiá e proseso di formashon, no ta negoshá via prensa. Nos ta kere ku banda di tur otro problema ku a surgi i oumenta den e periodo di gobernashon ku a pasa - gran parti di e sklama pa kambio ku Boneiru a laga tende riba dia 15 di mart tin di deber ku e falta di transparensia, e falta di dunamentu di kuenta i rason na pueblo ku Boneiru a eksperienshá den e ultimo

añanan”, segun e partido.

Manera Partido Demokrat a indika kaba den su komunikado di prensa di djasabra, komo partido ku e total di voto mas grandi di Boneiru, nan a tuma inisiativa pa habri kombersashon pa yega na un gobièrnu nobo mas pronto posibel. Manera indiká tambe, kombersashon ta andando, i Demokrat lo tene pueblo na altura di tur paso ku tin konsekuensha klaro pa formashon di un gobièrnu nobo.

Konvokashon

pa Reunion General Anual di miembro di Sociedad San Antonio de Padua

Fecha:
Lugá:
Ora:

Djaluna 27 di mart 2023
Kas di Sosiedat na Rincon
7’or anochi

Agenda:

1. Apertura
2. Aprobashon di nótulon di Reunion General anterior
3. Relato di direktiva di 2022
4. Relato finansiero di 2022
5. Relato di Komishon di kaha
6. Eleksion di miembronan di direktiva
7. Nombramentu di komishon di kaha
8. Turno liber
9. Klousura

Miembronan ku ta desea pa pone nan mes komo kandidato pa miembro di direktiva por notifiká esaki na direktiva via number di **whatsapp +599 787 0504.**

Direktiva kier rekordá miembronan pa kumpli ku nan deber di paga kontribushon.

Ofisina ta habrí djadumingu di 9or pa 12’or.

Direktiva di Sociedad San Antonio de Padua

Stipulashon definitivo resultado elekshon 23 di mart 2023

KRALENDIJK – Ku e stipulashon preliminar di resultado di elekshon riba nivel di kandidato ayera nochi, elekshon 2023 ta kasi yega su final. E biaha akí e asistensia tabata algu mas ku 64% pa elekshon di Konseho Insular i kasi 63% pa elekshon di Kolegio Elektoral. Despues di

kontròl di parti di Ofisina Elektoral Sentral lo stipulá e resultado den forma definitivo otro siman dia 23 di mart 2023.

Anunsio di e resultado preliminar riba nivel di partido a tuma lugá na fin di e anochi di e dia di elekshon. E resultado preliminar riba nivel di kandidato a tuma

lugá den oranan di anochi di e siguiente dia. Esaki ta pa motibu di uso di e prosedura nobo di stipulashon di resultado di elekshon. Un bentaha grandi ta ku e miembronan di e urnanan elektoral no tin mester di konta tur voto na nivel di kandidato bou di preshon di tempu ku fasilidatnan limitá despues di un dia di elekshon. A kolektá e votonan den forma sentral bou di supervishon den busonan di voto será i a warda nan na un sitio sentral. E siguiente dia bou di supervishon a konta esakinan na nivel di kandidato. E konteo akí no tabata na enkargo di e miembronan di e urna

elektoral ku e dia anterior a hasi e konteo riba nivel di partido.

E stipulashon definitivo ta dia 23 di mart despues di a pasa den e protokòl di kontròl, investigashon di notifikashonnan i stipulashon di konklushonnan. Te riba djars 21 di mart pa 10.00 or di mainta tin posibilidat pa hasi notifikashon òf entregá opheshon. Esaki ta 48 ora promé ku e seshon di ofisina elektoral sentral. Ofisina elektoral sentral ta kontrolá e notifikashonnan ku hendenan a hasi por eskrito i ku argumentashon dentro di e tempu stipulá. Si ta nesario ofisina elektoral sentral ta duna enkargo na e ofisina

elektoral di entidat públiko pa tene un seshon nobo.

E ofisina elektoral di entidat públiko ta investigá e konklushonnan di ofisina elektoral sentral hasiendo uso di e notifikashonnan i si ta nesario e ta ehekutá un rekonto parsial òf kompletu. Ta hasi rekonto solamente si e konklushonnan por tin influensia tambe riba e repartishon di asiento. Lo stipulá eventual korekshonnan ku konstatá e ora ei den un asina yamá ‘corrigendum’. Seguidamente ta formulá, publiká i entregá un prosèsverbal huntu ku e dokumentonan nesario na e ofisina elektoral sentral.



A selebrá dia di Himno Bandera Aruba

KRALENDIJK -- Rubianonan bibá na Boneiru a selebrá nan dia djasabra último. Esta ‘Dia di Himno i Bandera’. Selebrashon a kuminsá mainta tempran manera semper. Tra’i mèrdia tabatin un selebrashon mas den ámbito sosial.

Boneriano i rubianonan tin relashon fuerte ku otro. Hopi hòmer boneriano a bai traha den refinaria di Lago (Esso) den dékada trinta. Promé ku esei taba-

tin tambe un fluo di trahadó boneriano ku a bai traha den minanan di fòsfat na e isla ruman.

Hopi boneriano a bira famoso i konosí na Aruba. Djis pensa riba Noni Nicolaas ku su Nicolaas Store, Djidji Martinus ku su kompania di konvoi i agensia funerario, Papa Pourier i Buchi Martijn ku nan barnan den San Nicolaas, Wichí de Palm (fundadó di Palm Tours), Hubert (Lio)

Booi aktivo riba tereno kultural, Nechi Hart etc.

Mas aleu ta bon pa menshoná ku den dékadan setenta i te ku meimei di ochenta, hòbennan boneriano tabata bai presta nan servisio militar na Aruba.

Loke hopi hende no sa ta ku añanan pasá un grupo di hòmer boneriano a bini kòrta sentebibu na Boneiru, pasobra riba e isla aki mes no tabatin sufisiente kòrtadó.



KPCCN a bishitá Papa Cornes

Korps Politie Caribisch Nederlands djabierne 17 di mart a bishitá Skol Amplio Papa Cornes. Esaki den kuadro di e proyekto ofishi ku grupo 2 tabatin. E muchanan a haña splikashon kiko tur un agente polisial ta hasi i puntra tur loke nan ke sa di e ofishi.



Guus Gerritsen den Herensia djárasen awor

KRALENDIJK – Guus Gerritsen ta invitado djárasen awor den e programa Herensia na Bonaire.tv. Gerritsen a biba un periodo largu na Boneiru, Kaya Playa Lechi. Masomenos 12 aña pasá el a regresá Hulanda pa motibu di enfermedat di su esposa, kende mientrastantu a fayesé.

Gerritsen tabata na Boneiru anteriormente e luna aki huntu ku su kompañera

di bida nobo. Naturalmente el a bishitá redakshon di BONERIANO, na unda a disidí pa hasi un entrevista kuné. Den pasado ya kaba e tabata den e programa Herensia. E biá aki a papia kuné mas tantu riba kon a sigui despues kuné na Hulanda.

E programa aki ta estrená djárasen awor pa 12'or di mèrdia. Despues ta sigui vários ripitishon durante tres dia.



Kaya Klenku a bira Plenchi Makamba

KRALENDIJK – Tin situashonnan straño na Boneiru relashoná ku nòmber di kaya. Por ehèmpel tambe e echo ku tin fayonan ortográfiko garafal den basta nòmber di kaya, manera Kaya Francia (Fransia), Kaya Norwega (Noruega) i Kaya Spanja (España). Pa no

papia mes di falta di aksènt riba nòmbernan manera Kaya Bari i Kaya Tambú.

Resientemente un habitante di e sitio konosí komo Plenchi Makamba a informá BONERIANO ku e kaya ku ta drenta i sali e bario tabatin un bòrchi ku ta indiká ku Kaya Klenku. Sinembargo tin hende a kita e bòrchi i pone e bòrchi Plenchi Makamba.

“Nos no sa ken e hasi esaki? Ta gobièrnu mes a kambia e nòmber di e kaya aki i yam’é Plenchi Makamba. E kos aki por sosodé sin mas?”, e habitante ta puntra. Parse ku a duna e kaya aki nòmber di Kaya Klenku tin di aber ku echo ku pariba di e bario aki tabatin un fòrnu di klenku di e kompania Herrera i Hermanos. Te ainda e res-tunan di e fòrnu aki t’ei.



Josan Bonaire N.V.

ta buska

- 5 metselaar

- 5 timmerman

-mester tin 2 aña di eksperensia

Mas inf. tel. nr **717-7672**

Siña di bo historia, kultura i naturalesa

Bonaire.tv
Historia | Kultura | Naturalesa

TELBO kanal 70 Flamingo TV kanal 23

POLÍTICA

Kroon ketu bai e hòmbler di pueblo

KRALENDIJK- Un bia mas James Kroon ta demonstrá e forsa di un polítiko na momentu ku bo ta mantené un liña kòrtiku ku e votadó. Ku 1391 voto pueblo a mustra apresio pa Kroon. E táktika di trese Booi den e arena, kisas a sirbi positivamente. Apesar ku a bin basta zonido for di komunidad, ku a desaprobá e sistema tradishonal i agresivo di Booi pa hiba kampaña.

UPB a trese Jona Chiri-

no-Felida riba lista pa enfoká mas riba e parti sosial. El a logra 187 voto. Esaki sigur no ta un kantidat eksepsional, spesialmente si kompar'é ku 1088 voto di Nina Den Heyer na aña 2019. Ámbos polítiko ku mesun 'ekipahe' sosial.

UPB a demonstrá un fenómeno e kampaña aki. A trata na 'protehá' Kroon, p'esei e no a presentá den tur debate òf programa. Miéntas otro kandidato i Booi a hiba palabra. Esaki

tabata kuestionabel mirando ku Kroon semper a hiba palabra na nòmber di e partido bèrdè.

Loke ta remarkabel ta e echo ku UPB a enfatisá di ta reorganisá e partido. Nan ta bai pa hende hóben. Esei tabata e motibu ku a pidi dr. Esther Bernabela pa entregá su stul. Si studia e lista di kandidato, por nota ku e personanan ku ta pará mas ariba, tur ta bakénan den política.



Segun Suzy Thodé:

“Pueblo ta haña e gobièrnu ku e meresé”

KRALENDIJK- “E bon notisia ta i ta keda ku e pueblo ta haña e gobièrnu ku e meresé”, ta palabranan di Suzy Thodé. E ta lider di partido polítiko Union Revolucionario Boneriano (URB). Resultado di elekshon 2023 a demonstrá ku pueblo no tin masha konfiansa den e partido. Ku apénas 58 voto URB a sali e partido pèrdèdó. Thodé ta reakshoná ku lo siguiente.

“Kisas no mesora pero al final bèrdè ku blou ta sigui bati kabes. Papia hopi sin hasi nada den koalishon, kòrà ta sigui grita sin hasi nada den oposishon. Korupshon ta sigui, inhustisia ta sigui, pobresa ta sigui, frustrashon ta sigui. Pueblo ta sigui keda víktima ketu bai paso ningun hende no por kome ni bebe ni paga nada ku tur e materialnan di propaganda ku nan a



keda kuné. Tur kos ta sigui manera tabata kustumber, solamente mas pió. Di

Guatemala pa guatepeor i últimamente ayó Boneiru.”

Segun Thodé, URB ta e úniko partido ku no a firma pa e relashon aktual ku Hulanda. “Tur a firma pa Boneiru sigui manera Boneiru ta bai aki. Ta di bèrdat meskos nos ta sigui ‘de mal a peor’, anto riba dje di mes birando minoría ketu bai. E pueblo ta haña e gobièrnu ku e meresé, esei ta ko’i selebrá sin stòp. Nos

ta sumamente kontentu ku nos a logra kuminsá trese e bèrdatnan kla i raspá dilanti den publisidat. Bèrdatnan ku ningun otro no tabatin ni tin e kurashi pa trese dilanti den publisidat. Nos ta sigui hasi esei tambe, nos ta sigui ku e lucha pa pas, libertat i hustisia, pa nos tin tur nos derechonan i eksponé 100 porshento tur e bèrdatnan ku al final lo hasi Boneiru liber.”

Elvis Tjin Asjoe a pèrdè kara

KRALENDIJK- E sla mas duru di elekshon Konseho Insular 2023 ta e kantidat di voto di Elvis Tjin Asjoe. No por konklui otro, pueblo a rechasá e partido blou. MPB a bai atras ku 2 asiento mirando ku na elekshon 2019 nan a logra 4 asiento i awor 2 asiento.

E echo ku Tjin Asjoe a logra ‘solamente’ 93 voto ta kasi inkomprensibel. Na aña 2019 un total di 629 votadó a depositá konfiansa

den e eks lider di partido MPB. E rechaso ta pa e partido pero Tjin Asjoe ta esun ku a pèrdè kara.

Durante e kampaña polítiko a ‘tilda’ Tjin Asjoe di prinsipalmente kuida interes di e hulandes oropeo. E cambio dudoso den MPB di primeramente hasi Tjin Asjoe number 3 riba lista i despues presidente di e partido, a sòru pa hopi votadó kuestioná motivashon di e partido.

“Elvis a manda Henyson bai muri polítikamente”, tabata un ponensia vários bia skuchá for di diferente huki di e arena polítiko. Tur esaki sigur no a yuda e imágen di Tjin Asjoe.

Ramonsito Booi a hiba un kampaña personal kontra Tjin Asjoe. E no a laga niun duda ora e tabata desplegá su opinion negativo di e eks lider di MPB.

El a bula kurá ku su hendenan

Mas voto pa Benito Dirksz

KRALENDIJK- Buladó di kurá, Benito Dirksz a bai dilanti na voto. Por konklui ku el a bai ku tur su hendenan i ainda haña mas. Na elekshon di 2019 Dirksz tabata number 5 riba lista di Partido Demokrátiko Boneriano (Demokrat) i a logra 231 voto. Awor el a bai number 3 riba lista di e partido bèrdè, UPB i a saka 266

voto.

No por deskartá e grado di influencia ku Dirksz tin, mirando ku e ta un negoshante i naturalmente un dunadó di trabou. Dirksz ta un persona ku semper tabata basta aktivo komo miembro di direktiva den organisashonnan sosial. Kiko lo bira su ròl awor den UPB? Kisas konsehero di partido?

POLÍTICA

Análisis di Evidensia Real

KRANDELIJK- Noel Janga di Evidensia Real ta duna un análisis di koalishon komo konsepto.

Un di e nifikashon di koalishon ta, un identidat kreá dor di e union di partidonan ku a yega na un akuerdo mutuo pa traha pa logra propósitos komon.

Pa bo forma un koalishon fuerte e partidonan ku ta bai partisipá mester ta dispuesto di respetá otro komo persona, nan don i kualidatnan, konosementu i aktitut. Bo mester ta konsiente ku ora bo ta bai traha pa un propósito komon bo opinion personal no ta esun final pero e desishon komon di e grupo.

E desbentaha i bentaha nan di un koalishon nobo.

Tur esnan ku a lesa òf a skucha e programa di gobernashon presentá pa PDB por a tuma nota ku ta wòrdu papia di un deseo pa goberná 12 aña largu. Esaki ta pa motibu ku ta prak-

tikamente imposibel pa por logra tur promesanan den 4 aña di gobernashon.

Aktualmente nos tin un koalishon entre MPB i UPB. Ku ta sintá pa 4 aña kaba. Hopi kosnan ku a wòrdu primintí no a wòrdu kumpli. Pasobra kisas a pone prioridatnan na posishonnan robes. Esaki ta pone ku bo por a mira frankamente ku e tabata tin efekto negativo den e komunidad. MPB un di e miembronan di koalishon ta un ehèmpel di esaki. E evidensia ta ku el a bai atras drástikamente na voto.

Esaki no ta nifiká ku nan no ta kualifiká. Simplemente nan prioridatnan no tabata na lugá korekto.

E pueblo a sinti falta di nan atenshon. E otro partido di koalishon ta UPB.

Tin sufisiente evidensia ku nan sí a traha pa e komunidad aki conforme nan posibilidatnan ku nan tabata tin. Esaki tambe a wòrdu reflehá den e oumento di votonan pa ku UPB.

E desbalanse aki den e koalishon aktual ta un di e motibunan ku a pone ku gran parti di siudadanonan a pèrdè speransa den e koalishon aki. I esaki tin sigur di aber tambe ku algun karakter i aktitutnan di sierto personanan ku kier a imponé nan pensamentunan personal ariba boluntad di pueblo.

Esaki no nesesariamente mester nifiká ku e koalishon aktual ta malu den su totalidat. Sino ku algun pion den e koalishon a kometé erornan grave.

Manera mi a bisa kaba ku ta difísil pa logra tur metanan di gobernashon primintí den un periodo kòrtiku. Aktualmente mi ta sigur ku tin un struktura di gobernashon trahá ku a duna sierto resultadonan i tin plannan kla kaba pa sigui ku e desaroyonan.

Influensia di kambio di koalishon.

Ta bon pa evaluá kiko a bai robes i ken ta e kousantenan. Asina kambia e loke

ku a bai robes i esnan responsabel pa ku esaki.

Mi ta referí na e struktura interno di e koalishon aki.

Si esei sosodé i ta teniendo na kuenta ku opinion di pueblo, trahando asina un plan di akshon nobo lo por ta benefisioso pa hende.

Nos no por laga tampoko nan eksperensia riba e tereno di gobernashon afó.

Pasobra mester keda konsiente ku un kambio den e struktura interno di koalishon aktual por trese hopi kosnan kuné ku por stroba e desaroyonan. E desaroyonan aktual i planifiká lo por wòrdu aselerá ku un koalishon nobo pero tambe mester keda realístiko ku e posibilidat tei ku kosnan por stanka te asta para. Pasobra mester bai tuma tempu atrobe pa forma un koalishon ku un struktura nobo.

Kiko por ta motibunan ku un partido por bira mas popular?

Nos tur ta konsiente ku partido PDB ku a risibí 3978 tin un periodo basta largu pafó di koalishon. Ku eksepsjon di algun lunanan òf aña ku nan tabata aktivo den koalishon.

Mirando e desepshon ku MPB a trese pa su falta di atenshon i tambe e movimentu di piesanan klave for di e partido, ku a kita nan sosten di e partido aki a pone ku hopi a kambia bai den un otro direkshon.

PDB su lider Clark Abraham a risibí 1635 voto. Loke ku ta hasié e persona ku a risibí mas voto.

E motibu dikon esaki por ta posibel ta pa e forma kon e tabata profilá den oposishon. Probablemente esaki a pone hopi hende

pone konfiansa den PDB. E konosementu di Abraham di e materia polítiko i su presentashon den KI na banda di oposishon a kousa ku e PDB a risibí un chèns di pueblo pa goberná. Lamentablemente e sosten no tabata sufisiente pa duna PDB e kontrol apsoluto pa ku gobernashon.

Bo por bisa ku te na e momentunan aki tur e 3978 votonan lo por ta pòrnada si e koalishon aktual disidí di mantené nan relashon. Nada lo no por wòrdu hasi pa kambia esei. Pasobra ta e lei den konstitushon Hulandes ku ta vigente aki na Boneiru tin e último palabra.

Posibel formashon di koalishon

No por deskartá e chèns ku UPB i MPB lo por mantené nan posishonnan den koalishon. Dikon? James Pablo Kroon a deklara na vários okashon ku nan ta deseá di tin liderato di koalishon. E situashon aktual a pone e deseo aki kompletamente dilanti di Kroon.

Na e momentunan aki Kroon i Thielman ta e berdadero ganadornan di e elekshon aki, sin importá ku MPB a bai atras na voto i asiento i UPB a bai dilanti na voto i asiento. Na e momentunan aki e desishon final ta den nan man. Nan dos por disidí di mantené nan relashon pa kontinuá ku e desaroyonan sin muchu kambio. Nan mester a siña di e motibu di reklamo di parti di pueblo den nan direkshon i ahustá nan posishon i stipulá un direkshon mas conforme e boluntad di e pueblo.

Evidensia Real. Notisia Konfiabel!!!

UPB no ta pèrdè tempu

KRALENDIJK- UPB ta hasi bon kla ku nan no ta pèrdè tempu i warda te despues di rekonto. E partido a manda un komunikado di prensa splikando lo siguiente.

Tumando na kuenta e hopi deklarashonnan ku a keda trese dilanti último dianan, UPB ta tuma e siguiente posishon pa loke ta trata formashon di un gobièrnu pa Boneiru. Ningun partido no a haña mayoria apsoluto pues e gritu di kambio no ta fundá i ta trese bruashon den nos

komunidad; un mayoria pa kambio ta basá riba 5 asiento den eilandsraad. Esaki no a keda lográ pa ningun partido; e repartishon aktual ta 3 asiento DP, 3 asiento UPB, 2 asiento MPB i 1 asiento M21; partido Demokrat ta pidi rekonto di voto loke ta su pleno derecho, e rekonto aki lo tuma su tempu.

E ponensia aki ta trese kuné ku no tin sentido pa sinta ku partido Demokrat na e momentonan aki, pasobra nan tin otro repartishon di asiento den mente. Pa tur

e motibunan menshoná aki UPB ta tuma e siguiente punto di salida:

Di aplasá reunion ku Partido Demokrat te ora ku nan ta satisfecho ku e resultado di elekshon i pa no pèrdè tempu habri kombersashon nan ku Partido MPB i M21 pa eksplorá posibilidatnan di un gobièrnu pa Bonaire. Partido UPB ta spera ku pueblo tin komprension pa esaki, pasobra nos isla no ta benefisiá ku hopi tempu ta bai den rekonto i formashon di un gobièrnu nobo.

Fenómeno straño na tanki di Takutiá

KRALENDIJK – Tin un fenómeno straño alrededor di e tanki konosí komo Takutiá situá meimei di e

anterior plantashi Bolivia. Resientemente durante un rekorido ku Meine Breemhaar, doño di Bolivia, a

realisá den e region aki huntu ku Bòi Antoin, nan a topa ku basta paña di bisti kologá den palu i mata alrededor di e tanki Takutiá.

Breemhaar kier a tende historia oral relashoná ku Bolivia. Antoin a tene entrevista den pasado ku hopi hende tokante Bolivia. Por ehèmpel tin un seri di sinku programa ku Buchi Frans. A kore kuné henter e plantashi, parando na sierto sitionan pa a kontá. Por ehèmpel na pos, dam

i tankinan, pero tambe na kueba i ruina ku ta bisa algu di e plantashi.

Durante e rekorido a yega tambe na e dam di Ta-

kutiá, na unda a topa ku e fenómeno straño aki. Ken i pakiko a kologá e pañanan di bisti alrededor di e tanki aki no ta konosí.



Programanan di Bonaire.tv

TELBO kanal 70
Flamingo TV kanal 23

Djaluna 20 mart 2023

12.00 Aktualidat:	Sendion Balentin i Rogen Pineda
13.00 Aki Bonaire:	Desvelo di bustu Broertje Janga
14.00 Herensia:	Jaime i Louisa Emerencia
15.00 BAPA:	Ruthy Vrieswijk Bergen
16.00 Herensia:	Pedro (Toni) Coffie
17.00 Aki Bonaire:	Gielmon (Funchi) Egbregts
18.00 Herensia:	Anna Sophia Wong Loi Sing-Coffie
19.30 Puerto Latino:	Luis Zárraga
20.00 Herensia:	Astrid Therese Muller
21.00 Aki Korsou:	Izaline Calister
22.00 Herensia:	Harold (Papi) Martina
23.00 BAPA:	Mariette Oosterhoff

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.

Reflekshon di Siman

TORMENTA I ATVERSIDAT LO

PRESENTÁ; UNDA BO ENFOKE TA?

"Pasobra ku Bo mi por kaba ku un ehérsito; i ku mi Dios mi por bula ofer di un muraya." Salmo 18:29(BS)

Na unda bo enfoke ta ora tormenta o atversidat presentá? Riba e tormenta òf riba Señor Hesus ku ta huntu ku bo? Riba e atversidat o riba Señor Dios ku t'ei presente pa karga bo, sostené bo i yuda bo?

Ku bista riba Dios i Su promesanan, bo ta pasa den e tormenta ku fe i konfiansa. Ku un kurason fihá ku Dios ta Todopoderoso i Presente huntu ku bo. Ku Dios ta bringa e bataya pa bo conforme Su Santu boluntad.

Enfokando riba e tormenta nos ta pasa ku miedu, duda i kehamentu.

Konfiando Dios no ta nifiká ku e tormenta ta fásil? Nò, ap-solutamente ku nò.

Tormenta o atversidat: e nòmber mes ta bisa tur kos. Ta deskribí un suseso o situashon sumamente difísil i hopi bes e resultado por ta devastado.

Ta importante pa konsiderá ku miéntras nos ta na bida, tormenta, atversidat o problema ta bini. Pegá ku Dios i ku bista riba dJE, bo ta risibí Su sosten, Su pas i Su direkshon.

Salmo 18:34a ta bisa ku E ta tren nos mannan pa batayá, esei E ta hasi dor di diferente pruebanan. I e versíkulo di awe ta sigurá nos ku huntu kunÉ nos por bula ofer di un muraya. Ken mas mihó pa yuda nos krese meimei di situashonnan atverso.

Señor ta ku nos meimei di situashon atverso.

Miralda Paula-Frans

Produkshon PGM

A konkluí programa di TV 'Boneiru Ta Vota'

KRALENDIJK – Djaweps último a transmití e último episodio di 'Boneiru Ta Vota', un siklo di programa tokante elekshon pa Konseho Insular na Boneiru. Por a mira e

programa dos siman largu bibu na entre otro kanal 24 i e página di Facebook di NOS TV. 'Boneiru Ta Vota' a karakterisá su mes komo un 'late-night-talkshow' interaktivo tokante aktual-

dat, polítika i e elekshon di 15 di mart. Kada biaha dos polítiko i un persona for di komunidad tabata na mesa. Produksion i presentashon tabata na enkargo di Jericette Moniz. Miradónan di e

programa a sera konosí ku tur partido polítiko i kandidato i nan puntonan di bista. Tambe nan por a hasi pregunta via WhatsApp. Riba e dia di elekshon, tabatin un transmishon maratóniko,

kaminda henter dia nòn-stop un ekipo kompleto a duna relato bibu. Mirando reakhonnan ku a dreña, esnan ku a mira e programa a apresia tantu e talkshow komo e relato bibu.



Demokrat



a selebrá



Stadion nobo na Subí Blanku

KRALENDIJK – Mas i mas ta tendiendo ku lo bai traha un stadion nobo na Subí Blanku, na unda e fèlt di Snip ta situá. Diputado James Kroon a atmití ku

esaki a bini na diskushon últimamente na vários okashon, pero ainda ningun desishon no a kai.

Stadion di Playa ta den kondishon deplorabel ku

ta eksigí hopi mantenshon. Espasio pa stashoná outo dilanti e stadion aki tambe ta deplorabel, miéntas ku el a kombertí den un lugá pa pone kòntainer.

Último añanan no ta organisando kampionato di futbòl mas na Stadion di Playa.

E weganan ta tuma lugá den Stadion Antonio Trenidad na Rincon, ku a keda kombertí den un stadion moderno ku tur facilidat.

Kroon: “Enberdat futuro di Stadion di Playa ta den diskushon pa basta tempu kaba. Opshon ku a bini

dilanti ta pa bash’é abou i traha un stadion nobo na otro sitio. Ta bèrdat ku a pensa riba e sitio na Subí Blanku.”

Na e momentu aki no ta usando e tereno di deporte na Subí Blanku mas. Kabritu i buriku ta praktiká nan deporte di ‘kome yerba’ riba e tereno aki.

Mas pa nort ta praktiká e deporte di bolas.



Torno di misa Coromoto kedando kla



E torno di misa di Coromoto ta kedando kla. Ta keshon di algun dia mas pa e trabounan terminá i instalá e dos klòknan (Ludovico i Paulita) bèk. Parokianonan mes a aportá finansieramente pa gran parti pa hasi e trabounan aki. E torno tabata den kondishon deplorable i mester a drech’é.



Rijksdienst Caribisch Nederland
Onderwijs, Cultuur en Wetenschap

Studia na Hulanda?

Bo kier bai studia na Hulanda e **aña eskolar 2023-2024** benidero? E ora ei guia finansiero i/òf práktiko ta hopi importante.

Registrá promé ku **31 di mart 2023** pa bo bin na remarke pa un **Opstarttoelage** ku guia di RCN Studiefinanciering inkluí.

Si bo tin kualke pregunta òf bo ta desea mas informashon, manda un meil na **studiefinanciering@rijksdienstcn.com** òf yama nos na 715 8704.

DEN PASONAN DI BÒI

E rúbrika aki no ta kos di tur dia den BONERIANO. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den salimentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den rípitishon.

Despues di un par di siman turbulento tras di lomba, awe bida ta suponé di bini bèk na normalidat riba dushi Boneiru, manera mi amiga Morela sa yama nos isla. Morela Sterling tabata kolumnista di Extra den pasado. Su kolumna tabata titulá: “Esta dushi Boneiru ta”. E tabata skirbié na hulan- des i mi tabata hasi e tradukshon.

Loke mi ke bisa ta ku elekshon ta tras di lomba. Demokrat a gana na voto, pero di otro banda a keda na kuater asientu, loke no ta sufisiente pa nan so goberná. Nan mester buska un partner di koalishon, loke difisilmente nan lo bai haña.

Boso a ripará kiko nos

amigunan Monchi ku Tonchi por hasi? Nan a pone Boneiru aribabou siman pasá. Tin komentario indikando ku nan a yuda influensia resultado di e elekshon di siman pasá djárasen. Mi no sa i niun hende no sa. Echo ta ku Nina den Heyer i su grupo a kue nan ekspresshonnan tokante ‘hende desente’ tene duru i asta a saka tishùrt (#desente) ku ta referí na loke M&T a papia. Esaki ta demonstrá forsa di karikatura den korant. M&T ta loke sabínan ta yama awendia ‘influencers’. Un kos sí. Tiki ta esnan ku a komprondé e profundidat di loke M&T a bisa.

Despues di ‘selebrá’ elekshon ku baliamentu (Rincon Boys etc), pita- mentu di outo, asta bringamentu (na sede di UPB) etc etc ta bini pron-

to ‘Dia di Rincon’. Otro evento di selebrashon. Parse ku e selebrashon aki lo ta grandi atrobe. Parse ku ‘Dia di Rincon’ lo bai na e nivel ku e tabata ántes.

Resientemente tabatin inskripshon pa e festival di kanto den kuadro di ‘Dia di Rincon’. Mi a tuma nota ku tin un kantidat rekòrt di kantante ku a inskribí pa partisipá na e festival aki i ku probablemente lo bai mas ku un anochi. Kasi sigur un dje dianan aki Glenn Coffie ta yamami pa pidi mi sinta atrobe den kuerpo di hurado. Ta algu ku mi ta hasiendo pa hopi aña kaba. Broertje Janga a yega di pidi mi sinta komo hurado for di e promé festival aki, tené riba e esenario di Rancho Don Pedro, na kua okashon Sella Molina gana.

Mi ta sinta den hurado pa husga kontenido di e kansionnan. Mira si tur kos ta kuadra. Un ehèmpel simpel. Si un partisipante kanta tokante kimamentu di kalki i e menshoná ku tabata usa palu di wayaká pa kima kalki di mes mi ta vota kontra, pasobra e no ta klòp. I si un kantante



Nina den Heyer i Renata Domacassé ku flanèl di #desente, inspirá pa Monchi ku Tonchi.

kanta tokante trahamentu di karbon i menshoná ku nan tabata kap palu di sia pa hinka den fòrnu di karbon e ta fout. I esaki ta konta pa hopi otro kos.



Mi por reklamá ku mi tin bon konosementu di his-

toria, kultura i topografia alrededor di Rincon. Informashon ku mi a haña entrevistando algun shen hende di e barío i tambe studia buki i otro fuente. Pues mi sa mi stòf tokante Rincon.

MONCHI & TONCHI

Mester investigá ku si no tabatin kachó a vota den elekshon siman pasá.

Awèl sí. Pasobra Norbert a haña demasiado voto. Mester tin kachó ku a slùip dreña.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bòi Antoin
786-6818
Aviso
avisobon@gmail.com

Partner na Aruba

DI KUATER DJADUMINGU DI KUARESMA SIKLO A

Promé Lektura : 1 Samuel 16, 1b. 6-7. 10-13a

Salmo : Salmo 23, 1-6

Di dos Lektura : Efesionan 5, 8-14

Evangelio : Huan 9, 1-41

E espektákulo di un siegu ku ta pidi limosna riba kaya hopi biaha ta impreshoná nos profundamente. Ora nos mir'è, ta pensa riba KI bunita

ta pa por mira. Riba kaya drùk di siudat, tabatin un siegu ku un kachó banda di dje i un bleki den man. E no tabata papia nada, pero e tabatin un

bòrchi kologá na su garganta ku tabata papia mas ku loke palabra por a laga komprondé. E tabata bisa asin'aki: ABO no ta yama Dios danki pasobra bo por mira? E siegu, pasobra e ta biba den skuridat, semper ta pensa riba ki maravioso ta ku por mira. Miéntas tantu, nos ku ta pas'è forbei purá purá, ya ni sikiera ta must'rè apresio. Mesun kos ta pasa ku nos ku e lus di fe. Nos a kustumbrá ku e echo di ta kristian i ya nos 'n ta ni pensa ku nos a risibí un gran regalu di Dios, ku nos por mira.

Den tempu di Hesukristu, tabatin hende ku tabata ke mira, i hende ku no tabatin interes di mira. E proménan tabata esnan pover, malu, enfermo i simpel. Nan tabata sufri di malesanan fisiko i nan tabata mira den Hesus un Salbador. Ora nan a ser kurá, nan a habri wowo di nan alma i nan a kere den Señor. Asina a pasa ku e siegu di nasementu di e evangelio di awe. El a komprondé perfektamente ora Señor a bisa un dia na tur hende: “Ami ta e lus di mundu”. E tabata deseá di mira, e no tabata kontentu ku su skuridat, di dependé di limosna di otronan, di ser un persona inútil den sosiedat. E tabata ke traha, rekonosé hende, e tabatin deseo di biba. Ta p'esei el a buska Señor pa ser kurá. El a laba e wowonan i ora el a habri nan el a rekonosé den Hesus e Mesias Salbadó.

Den nos tempu tambe tin hendenan sinsero ku, manera e siegu, ta buska Dios. E welita temátika ku ta duna konseho na ñetunan i ta laga un rosario bieu pasa den su dedenan, ta buskando Dios. E esposa ku bintikuater ora pa dia ta sakrifiká pa duna alegría i sosten na su esposo i yunan, ta buskando den nan un refleho di Dios. E tata di famia ku ta traha duru p'asina su famia tin pan, salú i alegría, ta buskando Dios. Esnan namorá di otro ku ta pone Dios komo testigu di nan amor i unidat, ta ponien do Dios den nan búskeda di felisidat. Nos ta bini Misa riba djadumingu, nos ta lesa beibel, nos ta resa den komunidad di rumannan: e loke ke men ku nos ta buskando Dios. Hopi hende no ta bini misa, hopi ni sikiera ta kristian, pero nan ta



hasi esfuerso pa ta siudadanonan honrá i sirbi otro. Nan tambe ta buskando Dios i ta hañ'è. E ehèmpel di e siegu ku a buska Dios i a hañ'è, ta duna nos konsuelo i speransa den nos bida.

Tin otro grupo den e evangelio: nan ta esnan ku no tin interes den buska Dios. E fariseonan tabata asina sigur di nan mes ku nan no tabata ke mira e Dios ku Hesus tabata must'a nan. Tabata pasa ku nan manera ora lus di solo ta blèndu nos i nos ta tapa wowo ku man pa no mira solo. Nan no tabata por soportá ku Kristu lo a trese demasiado lus riba nan bida skur i shushi.

Dilanti lus di e palabra di Señor nan tabatin ku rekonosé nan maldat, nan ambishonnan i egoismo i hipokresia di nan bida; i nan tabatin miedu. Ademas, e brio ku sabiduria i bondat di Hesus tabatin dilanti di pueblo, tabata un lus ku lo a bin hasi nan skur. Nan tabata pretendé di ta e únikonan importante, e úniko guianan di pueblo. Ora nan a mira ku e pueblo tabata sigui Señor pasobra e tabata bon, ku e tabata duna nan speransa i tabata kura nan fèrmidatnan, nan tabata yalurs. Nan tabata sinti nan mes menasá pa su popularidat. I nan a será nan kurason pa fe ... pa e Mesias. Nan a disidí di ta siegu boluntariamente. Pero nan sieges a hiba nan den perdishon.

Hopi di nos por ta manera e fariseonan. Nos tin miedu di pone Dios den nos bida; nos no ke pa fe iluminá nos konsenshi i nos kondukta. Tin hopi negoshante i profeshonal ku ta eksplotando esnan pover ekonómikamente, pero nan no ke mira ku e pover-

nan aki tin mes tantu derechi riba hustisia meskos ku nan. Tin pareha di esposonan ku ta biba den skuridat huntu ku otro: nan no ke mira rason- ni balornan ku e pareha tin. Den tur e kasonan aki nos ta ninga pa e lus di evangelio iluminá nos bida. Nos tin miedu di sa kua ta nos responsabilidat- i obligashonnan. Ora nos ta saka reibeweis pa kore outo, nan ta chèk ku nos tin bon bista i nan ta puntra nos si nos konosé e leinan di tráfiko. Si mi tin un bista malu o no ke mira lusnan di tráfiko, despues lo mi tin un aksidente. Nos no por duna nos mes e luho di kana den skuridat den e mundu aki, ni den bida diario ni tampoko den fe.

Ora e siegu di nasementu a haña su bista, el a eksperensia un gran pas i speransa den su kurason. Ora e enemigunan di Señor a ninga di mira i kere, nan a sinti nan mes menasá i tristu. Tambe awe, den nos tempu, Hesukristu ta presentá su mes na nos komo un lus i un oportunidad. Nos tin ku disidí entre un di e dos kosnan. Òf nos ta tuma e aktitut di e siegu ku tabata ke mira sinseramente i nos ta buska Dios —e ora ei nos eksistensia lo kobra alegría i sentido—, òf nos ta preferá di ta manera e fariseonan, rechasa e oportunidad aki di fe: e ora ei nos lo kana den skuridat. Si ta algu balioso di tin habri wowo- nan di kurpa pa mira koló, tambe ta balioso mira e kosnan kla de nos mente i den nos konsenshi; tambe ta masha importante mira Dios den nos bida, tin fe.

Nos a bini ta buska Dios. Mare e lektura di Beibel iluminá nos mente i siña nos e kaminda bon. Mara e pan di eukaristia laga nos mira Dios presente mei mei di nos. Ku e saludo di pas i orashon huntu laga nos mira den otro nos rumannan.

Deboshon na e Dibino Miserikòrdia

“Tene miserikòrdia ku nos i ku henter mundu” ta e palabranan ku Kristu Hesus a dikta na Santa Faustina.

Kristu Hesus ta invitá nos pa kooperá den e realisashon di e plan dibino di Dios, pa medio di resamentu di e Korona di Miserikòrdia. Nos konosé eksistensia di e Korona òf Rosario di Miserikòrdia pa medio di e Diario di Santa Faustina.



E promé biaha ku Kristu Hesus a revelá na Santa Faustina e palabranan di e Korona di Miserikòrdia, tabata riba djabièrñe 13 di sèptèmber 1935. Santa Faustina a haña un vishon di un Angel, mandá pa Dios pa kastigá un sierto lugá. Santa Faustina a kuminsá resa, pero su plegaria no tabata efikas i su orashon tabata sin poder. E momento ei Santa Faustina a haña un vishon di Santísima Trinidad i a skucha e stèm di Kristu Hesus den su alma ku a revelá e siguiente palabranan ku Santa Faustina a dirigí na Dios Tata: **Tata Eterno, mi ta ofresé Bo e Kurpa i e Sanger, Alma i Dibinidat di Bo Yu bienstimá, nos Señor Hesukristu, pa ekspiashon di nos mes piká i di henter mundu. Pa Su doloroso pashon, tene miserikòrdia ku nos i henter mundu** (Diario 475).

Santa Faustina a keda ripití e orashon akí i el a mira den e vishon ku e Angel no por a kontinuá ehersé e kastigu ku e lugá tabata meresé.

E siguiente dia, ora Santa Faustina a drenta den e kapia di su konbento, el a tende den su interior e stèm di Kristu Hesus bisé: **Kada bes ku bo drenta den e kapia, resa inmediatamente e orashon ku mi a siñabo ayera** (Diario 476). Kristu Hesus a bisé pa resa e orashon aki riba e kuenta di un Rosario komun pa e kombershon di pekador- nan, esnan ku ta leu di Dios i partikularmente pa esnan ku ta agonisando. Ta Kristu Hesus mes a dikta e orashon palabra pa palabra na Santa Faustina (Diario 476).

Hesus mi ta konfia den Bo

Asosashon Mishoneronan di Dibino Miserikòrdia Curaçao

KÒRSOU

Kaso di tiramentu ku morto

WILLEMSTAD --Djadumingu 19 di mart den oranan di mardugá, sentral di polis a risibí informashon di un kaso di tiramentu ku a tuma lugá na Plasa Hariri/Rotonde Palu Blanku. A dirigí unidad polisial na e sitio i na su yegada a enkontrá un hòmbler drumi abou ku no ta duna señal di bida.

For di un investigashon preliminar a sali na kla ku pa motibu te ainda deskonosí lo mester a tuma lugá un tiroto e bala a alkansá e víktima na parti ariba di su kurpa. Ambulans ku a yega na e sitio no por a hasi nada mas pa e víktima.

Dòkter di polis a yega na e sitio i a konstatá morto di e hòmbler Niven Clem-

ens Patrick Van Thijs nasé Kòrsou dia 16 ougùstùs 2000.

Na e sitio polis a haña i konfiská e siguiente artíkulonan ku ta di importansia pa e investigashon. Ta trata aki di un vehíkulo ku e víktima tabata okupá, arma di kandela i algun kashi di bala (huls). Investigashon den e kaso aki ta kontinuá.

Relashoná ku maltrato relashonal i ladronisia

Detenshon den Kura Piedra

WILLEMSTAD --Relashoná ku un kaso di maltrato relashonal ku a tuma lugá djasabra dia 18 di mart atardi den Kaya Kura Piedra, kaminda un hòmbler lo a maltratá su èks pareha,

polis a hasi detenshon.

Djadumingu 19 di mart mainta riba òrdu di Fiskal di Ministerio Públiko polis a hasi detenshon di e hòmbler sospechoso G.G.S., nasé na Kòrsou di 22 aña

di edat, pa e maltrato ariba mensioná. A presentá e sospechoso dilanti un fiskal ouksiliar ku despues di interrogashon a ordená su enkarselamentu pendiente di mas investigashon.

Entre Kòrsou i Trinidad & Tobago

Akuerdo bilateral nobo

WILLEMSTAD -- Resientemente, outoridatnan di Aviashon Sivil di Kòrsou i Trinidad & Tobago a bai di akuerdo ku kontenido di un akuerdo bilateral pa servisio aéreo nobo entre

e dos paisnan. Outoridat di Aviashon Sivil di Kòrsou a enkabesá e delegashon di Kòrsou. E akuerdo nobo aki lo remplasá e akuerdo bieu di 1997 ku tabata riba nòmber di Antias Hulandes.

E akuerdo nobo aki ta unu di karakter liber i 'state-of-the-art'. Esaki ta enserá ku kompanianan di aviashon di tantu Kòrsou komo di Trinidad & Tobago awor lo por ofresé

servisionan aéreo entre e islanan aki sin limitashon, i segun ku nan mes ta husga esaki komersialmente. Tur esaki teniendo kuenta ku kumplimentu ku reglanan i standartnan internashonal di seguridat.

Seguidamente Konseho di Minister di Reino Hulandes mester aprobá e akuerdo aki, i representantenan ofisial di kada pais ta firm'e. E proseso aki total lo por dura masomenos 3 luna.

Aksidente ku morto i detenshon

WILLEMSTAD --Djárason 15 di mart sentral di polis a risibí informashon ku un aksidente mester a tuma lugá riba Caracasbaaiweg na altura di un kompleho di apartamentu. Na yegada di polis nan a topa ku un vehíkulo ku tres persona i un di e personanan ku tabata sinta patras den e vehíkulo no ta

duna señal di bida.

For di e investigashon preliminar ku polis a hasi na sitio a resultá ku e dama shofùr lo mester a pèrdè kòntrol riba stür i a bai aksidentá den un palu di lus.

Ambulans ku a presentá na e sitio no por a hasi nada pa e víktima debí na e múltiple leshon ku el a risibí na su kabes.

Alrededor di 00.15'or a detené e dama shofùr di e vehíkulo D.v.d.W., di 29 aña di edat nasé na Kòrsou, pa mas investigashon.

Na e sitio dòkter di polis a konstatá morto di e hòmbler Gilles Van der Burg, nasé na Hulanda, dia 16 di ougùstùs 1966.

Investigashon den e kaso aki ta kontinuá.

Editorial Sousa-Alexander ea Ra B.V.

ta buska

- 1 kosedó industrial i operadó di fabrika di paña

-mester tin 2 aña di eksperensia, no ta indispensabel, formashon téknika na konfekshon textil.

Pa mas info yama

Janeth de Sousa-Gomes na 717-1806

Peña Traha Pa Bo B.V.

ta buska

- 4 metselaar

Inf. tel. nr **785-3119**

Pa ladronisia, falsifikashon di dokumentu i menasa.

Detenshon agente femenino

WILLEMSTAD --Kontinuando ku un investigashon relashoná ku un kaso di ladronisia, falsifikashon di dokumentu i menasa, polis a hasi detenshon.

Djasabra 18 di mart 2023riba òrdu di Ministerio Públiko, polisnan di e Departamento di Asuntunan Interno di Kuerpo

Polisial Kòrsou (BIZ), a hasi un detenshon. Ta trata di un agente polisial femenino A.E.M., di 48 aña di edat nasé na Kòrsou, pa e kaso ariba mensioná.

A presentá e sospechoso dilanti un fiskal ouksiliar ku despues di interrogashon a ordená su enkarselamentu pendiente di mas investigashon.

Detenshon i konfiskashon

WILLEMSTAD --Personal di Divishon di Krímen Organisá riba djaweps 16 di mart a tene un entrada hudisial na un adrès den Zumbu, en konekshon ku violashon di lei di droga. Durante di e entrada hudisial polis a haña i konfiská un kultivashon di matanan di

mariwana.

Na sitio detené e hòmbler sospechoso I.G.C.G., di 22 aña di edat nasé na Venezuela.

A presentá e sospechoso dilanti un fiskal ouksiliar ku despues di interrogashon a ordená su enkarselamentu pendiente di mas investigashon.

Fiscal a exige 3 aña di prison pa G.H.

Senjal bon cla cu no ta tolera cu ta perhudica turismo

ORANJESTAD -- Corte di Husticia a trata e caso penal cu Ministerio Publico a cuminsa contra e homber Dominicano G.H.(44), sospechoso di "skimming" (copia credit cards). A exige 3 aña pa e acusado. Por a compromete cu Fiscal ta haya G.H. culpabel y a exige 3 aña di prison. El a muestra cu American Express a haci denuncia na Polis di Aruba cu a hit nan 184 mil dollar cu credit cards falso.

E acusacion cu Fiscal a presenta den Corte contra G.H. biba na Aruba, ta cu entre Juli 2021 y September 2022, a "skim" cantidad di credit cards. Tambe Fiscal ta acusa G.H., di ta forma parti di un organizacion criminal.

Durante tratamiento di e caso, G.H. a bisa Hues cu un tal Alex y Diego a aserk'e pa saca potret di credit cards y lo paga 20 dollar pa potret. G.H. a bisa Hues cu e conoce Alex pa basta tempo y door di esey, el a acepta e oferta. G.H., kende tabata traha e tempo ey den un restaurant, tabata coy e credit card di clientenan pa bay cash y tabata saca potret di esaki manda pa Alex y Diego.

Denuncia

Hues a muestra cu tin denuncia di American Express na Polis di Aruba. Nan a informa cu tin 21 raport fraudulento di credit cards cu a suma 184 mil dollar. Ta asina cu tin hasta potret di un persona cu a haci uso di e credit card falso na Miami.

Investigacion di Polis a muestra cu 16 di e fraudenan ta haci door di G.H. kende e tempo ey tabata traha na e restaurant. G.H. a bisa cu e ta admiti di a saca potret di credit cards. El a desmenti cu e potret saca na Miami ta di dje. El a bisa cu nunca el a bay Miami.

Segun G.H., na dado momento e kier a stop, pero el a wordo menaza. Hues a puntra G.H. kico tabata e intension di saca potret di credit cards. G.H. a bisa Hues cu e momento ey e no tabata sa kico tabata nan intension. Awor e ta realiza cu loke el a haci ta malo.

Detencion

Relaciona cu e investigacion, ora cu a detene G.H. na su cas na September 2022, miembronan di Recherche a haci investigacion den e cas y a bin haya un aparato cu ta wordo usa pa skimming, esta copia informacion di credit cards. Tambe a haya un laptop cu tin un programa special aden.

Segun G.H. e no a usa e aparato. El a keda saca potret pero ora nan a pidi pa haci mas cos el a nenga. E tabata manda potretnan pa un tal Diego y Alex. Segun G.H. na dado momento nan a menace di mata su tata cu ta ciego y su famia. El a bisa cu na dado momento nan a yam'e y laga su tata papia cun'e. Esey ta pa muestra G.H. cu nan sa unda su tata ta biba. Segun G.H., e tabata saca potret di credit card di mesanan cu e tabata sirbi.

Ta asina cu den e celular di G.H. a bin haya 1385 potret di credit card cu el a saca. Segun G.H. e no a haci'e pa placa. El a bisa Diego y Alex pa manda e placa Santo Domingo, riba cuenta di G.H. su ruman muher. E ta calcula 3 mil dollar, nan lo a manda Santo Domingo. Ta asina cu G.H. a haya e aparato di skimming y e laptop for di e duo. Segun G.H., Alex a bis'e cu nan ta haciendo esey na Curacao, Sint Maarten tambe.

Fiscal bisa cu investigacion a muestra cu G.H. a saca 1385 potret. Esey kermen cu G.H. a haya mas

o menos 30 mil dollar y no e 3 mil dollar cu G.H. ta bisa. El a sigui bisa cu a haya aparato di skimming y laptop pa haci cosnan. Pero tin combersacion cu Diego cu ta muestra cu G.H. tabata manda potret via laptop tambe.

Fiscal

Fiscal a bisa Hues cu e caso aki a cuminsa ora cu American Express a haci denuncia na Polis di cu a usa credit cards falso y hit 184.190 dollar. Esaki na un restaurant na un Hotel. Relaciona cu e denuncia, dia 21 September 2022 G.H. a wordo deteni y den camber a haya un aparato di skimming y un laptop. Fiscal a muestra cu den celular di G.H. a haya 1385 potret saca di credit cards di cual 308 ta di American Express.

Na opinion di Fiscal, si bay conta tur e carchinan falsifica ta den miyones di dollar a wordo horta. El a bisa cu G.H. tin suerte cu ta solamente American Express a haci denuncia.

Fiscal a muestra cu solamente saca potret di credit card bo no tin nada. Mester di informacion di e carchi y data di e carchi pa asina por falsifica esaki. Fiscal a bisa cu G.H. por nenga di a usa e aparato di skimming pero tin sospecho cu e tabata usa esaki y manda informacion riba laptop.

Fiscal ta haya cu G.H. ta forma parti di un organizacion criminal cu ta dedica su mes cu fraude di credit cards. Segun Fiscal, ta door di G.H. tur informacion di credit cards tabata wordo manda pa Alex y Diego den exterior durante 1 aña y 3 luna.

Demanda pisa

Fiscal a anuncia cu lo bay cuminsa un caso pa kita propiedadnan mirando e cantidad di placa cu G.H. a gana pa saca potret. Fiscal a bisa cu skimming di credit cards ta sumamente fastioso tanto pa e usador di e credit card y e companianan cu ta facilita credit cards. Esaki ta mina sistema financiero y ta afecta turismo.

Fiscal a bisa cu mester manda señal bon cla cu no ta tolera skimming cu ta perhudica turismo di Aruba. El a exige 3 aña di prison pa G.H. Haya cu mester manda senjal bon cla cu no ta tolera esaki cu ta perhudica turismo di Aruba.

Hues, despues di a scucha defensa di abogado, a sera tratamento di e caso y a bisa cu dia 6 April 2023 lo tin sentencia

Wingo a cuminsa bende pasashi pa y for di Cali

ORANJESTAD -- Aruba Airport Authority N.V., manehado y operado di Aeropuerto Internacional Reina Beatrix (Aruba Airport) ta sigui expande su rutanen den Colombia. "Nos ta entusiasma pa anuncia cu awe nos aerolinea partner, Wingo, a cuminsa bende pasashi pa y for di nan destinacion nobo, Cali - Colombia.

Wingo ta un partner importante y valioso pa e aeropuerto di Aruba. Nos ta contento cu e ruta y servicio nobo for di Cali, Colombia. Asina nos a habri un otro ruta den Colombia. Nos ta sigui expande nos horizonte den Colombia y nos ta cla pa facilita nos partner Wingo den esaki, diversificando nos red den e mercado di Latino America", asina Barbara Brown, Chief Revenue

Development & Communications Officer na AUA Airport a duna di conoce.

Benta di pasashi desde dia 16 di maart 2023. E benta di pasashi pa e ruta nobo aki awor ta disponible riba e website di Wingo, esta www.wingo.com, of via bo agencia di viahe preferi cu ta bende pasashi pa Wingo. Entrante dia 1 di juli 2023, Wingo lo cuminsa bula dos vuelo pa siman directamente pa y for

di Cali, Colombia, riba diaranson y diasabra, cu nan avion B737-800 cu espacio pa acomoda 189 pasahero. E operacionnan aki ta traduci den aproximadamente 1500 stoel adicional pa y for di Aruba cu Wingo. Cu e servicio adicional aki desde dia 1 di juli 2023, awo Wingo lo opera shete vuelo pa siman for di Colombia, tres di Bogota, dos di Medellin y dos for di Cali.



STATIA/SABA/ST. MAARTEN

Resultado di elekshon aprobá

THE BOTTOM – Ofisina Elektoral di Entidat Públiko Saba djaweps mainta a bini huntu pa chèk e prosèsverbalnan di e dos urnanan elektoral, pa asina aprobá a resultado di elekshon di djáron 15 di mart. Ofisina Elektoral no a haña

ningun diskrepansia den e resultado i konsekuente a probá esaki.

Gezaghebber Jonathan Johnson, komo presidente di Ofisina Elektoral, a entregá e resultadonan di e urnanan na The Bottom i Windwardside. Tabatin dos

resultado pa urna, unu pa elekshon di Konseho Insular i unu pa e elekshon di Kolegio Elektoral pa Eerste Kamer.

Despues di a kontrolá e resultadonan, miembronan di Ofisina Elektoral a firma e dokumentonan. Tabata presente e dos opservadónan internashonal independiente di Organization of American States (OAS).

Konkurensia di voto

E elekshon di djáron 15 di mart tabatin un konkurensia di voto di 83.64% ku 1,040 persona ku derecho di voto. E konkurensia akí tabata mas abou ku e elekshonnan di 20 di mart 2019

tempu ku e konkurensia di voto tabata 92.12% i e kantidat di persona ku derecho di vota tabata 1,078.

E resultadonan di elekshon ta konfirmá ku 617 di e votonan bálido di 1,040 voto bálido, a bai pa Windward Islands People's Movement (WIPM), representando 59.33% di e votonan. Miembronan ku voto eligí pa Konseho Insular ta Bruce Zagers ku 191 voto, Rolando Wilson di voto personal i Eviton Heyliger ku 122 voto.

E partido Party for Progress, Equality and Prosperity (PEP) a risibí 324 voto, 31.15% a optené dos asiento. Saskia Matthew ku 137 voto personal i Hem-

mie van Xanten ku 26 voto personal, a keda eligí komo miembro di Konseho Insular. E lista blanku di Dave Levestone a haña 85 voto i no a optené asiento. E partido nobo, Saba Caring People Party of Enrico 'Cuchie' Klaber, a risibí 4 voto.

Kolegio Elektoral

Djaweps a anunsiá tambe e resultadonan di e elekshon di Kolegio Elektoral. Un kantidat di 496 voto a keda depositá, di kua mayoria, 177 òf 35.69%, a bai pa WIPM ku su lider Bruce Zagers.

E konkurensia di voto di Kolegio Elektoral tabata 59.3%. Saba tin sinku asiento di Kolegio Elektoral.



Handmade on Saba a habrí oficialmente

THE BOTTOM – E tienda di artikulonan di obra di man na Saba, Handmade on Saba, a habri oficialmente pa públiko dia 11 di mart. E tienda ku ta keda na Breadline Plaza na Windwardside, ta un kolaborashon artístiko ku a establesé na 2023. Diferente artista a bini huntu pa krea un plataforma pa siña i inspirá, miéntras tambe proveé un nivel abou di entrada pa stimulá i aportá na artistanan lokal.

Diputado Rolando Wilson oficialmente a habri e tienda dor di kòrta sinta.

Den su diskurso el a mensioná ku habri un tienda no tabata un paso fásil i a tuma kurashi i determinashon pa logra esaki.

Wilson a bisa, e ta admirá e grupo di artista i nan disponibilitat pa riska kumpli ku nan soño. El a indiká ku e tienda no ta solamente un lugá di hasi negoshi, pero tambe e tètament di e vision i kreativitat di e grupo.

Miembro fundadó di e kolaborashon di artista, Anna Keene, a gradisí tur hende pa nan aporte i a bisa e ta kontentu ku e tienda a kristalisá.

Keene a bisa el a traha ku 15 artista riba e realisashon i ta spera ku mas lo sigui pa demostrá nan talento i kreativitat ku e hende na Saba tin pa ofresé.

Na Handmade on Saba, tur artíkulo ta trahá lokal. Artistanan lokal ku ta interesá pa show nan obra, por tuma kontakto ku e tienda.



Polis ta tira dirigí riba atrakadónan

AMSTERDAM – Polis di Amsterdam djárason anochi a tira dirigí durante detenshon di tres hóben menor di edat, despues di e atrako den un kas. Ningun di nan a resultá heridá, polis a informá djaweps mainta. Tambe a lòs tiru di atver-tensia.

E hóbenan a kometé un atrako armá djárason

den un kas na Gooioord na Amsterdam-Zuidoost. Aki nan nan a maltratá e dos habitantenan i a hui ku mas kos. Despues di un akshon di búskeda kòrtiku, a detené nan, polis ta informá. A trata e habitantenan na e sitio.

E sospechosonan djaweps ainda ta será i por tin kontakto solamente ku nan abogado.



Skarsedat remedi di diabétis ta dura ainda henter año

HULANDA – E skarsedat mundial di remedi di diabétis, Ozempic, ta dura ainda henter año, College ter Beoordeling van Geneesmiddelen (CBG), ta informá.

E skarsedat a originá pasobra e demanda e último tempu a oumentá lihé. Ta usa e remedi tambe komo medio pa baha peso, miéntras e no ta aprobá pa esaki dor di

autoridatnan di remedi.

Na Hulanda Ozempic ta aprobá solamente pa hendenan diabético i ta keda preskribí prinsipalmente pa hende diabético tipo 2. Kasi 1.1 mion hulandes tin e diagnostiká akí.

E remedi ta redusí e imágen di suku den sanger. CBG ta atvertí pa no usa e remedi sin supervishon di un dòkter.



Dos detenshon pa froude ku supsidio

EINDHOVEN – Den un investigashon pa froude ku supsidio europeo, servisio di rastreo di Inspekshon di Labor a detené dos hulandes. Ta sospechá e hòmbenan di 50 i 55 año di a kometé falsifikashon di dokumento. Dor di esaki finalmente nan lo a haña un botin di kasi mei mion euro dor di entre otro trabou ku nunca nan a hasi.

A detené e hòmbenan na Eindhoven i Roermond. Huntu nan tabata manehá un organisashon i ofisina di konseho na Eindhoven.

Empresanan ku tabata

en buska di treinen di nan trahadónan pa mantené nan salú i keda motivá, tabata hür e ofisina. E empresanan

por a hasi apelashon riba supsidio europeo momentu ku nan involukrá e ofisina di konseho di Brabant.



Orígen detenido morto den sèl ainda sin klaridat

KRIMPEN AAN DEN IJSEL – Durante un promé investigashon, ainda no tin klaridat di e orígen di morto di un detenido den e prizòn na Krimpen aan den IJssel. Djárason a haña e hòmberto morto den su sèl.

Polis solamente ta laga sa ku ta trata di un hòmberto di 24 año sin lugá di biba fiho.

Djárason ya a parse ku un kolega di sèl ta keda remarká komo sospechoso. Ta trata di un hòmberto di 29

año di Den Haag. Ainda ta interog'é.

Segun Rijnmond, e ko-detenido a nenga anteriormente pa bandoná e sèl di e víktima. Finalmente ku ayudo di e tim di asistencia, a hib'é un sèl isolá.

Yudoka ta flur ladron di pakus

ROTTERDAM – Yudoka tòp, Roy Meyer, e fin di siman ku a pasa a yuda na detenshon di ladronnan di pakus na Rotterdam. Su eksperensia di yudo a kuadra aki nan.

E deportista di 31 año tabata sintá den su outo ku su famia momentu ku el a mira un personal di siguridat ta kore tras di dos posibel ladron di pakus. “Esaki a sosodé sinku meter for di mi outo. Mi a puntra mi amiga sí mi mester bai yuda i e la bisá mi: ‘Bai nan tras.’ Mi a kore riba mea nan tras,” Meyer a konta media regional Rijnmond.

Despues di un persigui-shon di un shen meter asina, e yudoka a logra gara un di e hòmbenan. “Mi a tené ku un man na su krag i e bent'é na suela. El a

keda drumi nèchi momentu ku mi a bis'é pa no laga mi bolbe kore un biá mas.”

E personal di siguridat por a a logra detené e di dos hòmberto. Polis a tuma e hòmberto ku Meyer a kue over. “Nan a tuma mi deklarashon i a gradisí mi.

Despues nos a bai kome.”

Polis a gradisí Meyer riba media sosial. “Un bunita ehèmpel kon por spera yudansa for di un huki inesperá,” polis ta skirbi. E dos ladronnan segun polis, a hòrta 80 euro na kaminda den supermarket.



DEPORTE

FC Champs 2-0 riba Hobon

KRALENDIJK--E tim di futbòl veterano, por sièrto un tim bastante aktivo ku ta FC Champs, djasabra último den oranan di atardi, den partido ku a tuma lugá na Fèlt Elion Flores na

Amboina, a gana di Hobon ku skor di 2-0 den partido di futbòl veterano 50+.

E dos ekiponan veterano 50+ a hunga un tremendo partido kontra otro, di kua FC Champs 50+ bai ku e

viktoria di 2-0 riba Hobon.

E ekiponan a demostrá tremendo futbòl veterano na nivel pero tabata FC Champs ku a sali di porta grandi ku e viktoria di 2-0.

E golnan di e partido ta-

bata di Jair Bernabela i Servacho Bomba ku a hinka e golnan pa FC Champs gana Hobon ku e skor di 2-0.

Djasabra awó 25 di mart FC Champs 50+ ta enfrentá e ekipo di Tera Blanku 50+

pa 5or atardi na Fèlt Elion Flores na Amboina.

Nos ta deseá e ekiponan tur klase di éksito den e partido. Otro siman nos lo bini ku e resultado di e partido aki.

Plei-òf Bola-8 ta sigui mañan

KRALENDIJK--Plei-òf di biliart bola-8 ta sigui e siman aki ku dos partido mañan djumars 21 i djaweps awó 23 di mart 2023, esaki ku partidonan ku ta tuma lugá 19:30 den sala di biliart di Kompleho Deportivo Jorge Nicolaas na Kaya Amsterdam.

Partido djumars 21 mart 2023.

Pa loke ta trata e partido pa mañan djumars 21 di mart 2023, riba e dia aki ta enfrentá otro e ekiponan The Untouchable i Azteca 19:30 anochi.

Pa loke ta e partido djaweps awó 23 di mart

2023, riba e dia aki ta topa otro e ekiponan La Tropicana i Mastertouch 19:30 na Kompleho Deportivo Jorge Nicolaas na Kaya Amsterdam.

E partidonan pa e siman aki sigur tei bira dos otro tremendo partido, sigur hopi interesante por sièrto

rumbo pa yega final di e campeonato ku ta un seri mihó di tres di kua e ekipo ku gana dos wega ta titulá kampion.

Éksito na e ekiponan den e plei-òf ku nos sigur ta

sigui esaki

hopi djaserka pa abo ta bon informá.

Keda pendiente pa e partidonan ku falta ainda di e plei-òf.

Stars Bonaire den torneo na Aruba

KRALENDIJK--E tim di sòftbòl veterano 60+ di nos isla ku ta Stars Bonaire, fin di siman pasá ku selebrashon Dia di Aruba, tabata den torneo anual Himno i Bandera 2023 di Aruba Juniors.

E torneo aki a tuma lugá djasabra 18 i djadumingu 19 di mart 2023.

Na e torneo aki a partisipá timnan di Aruba, Bonaire i Kòrsou.

Pul A.
Stars Bonaire.
Glovers.
Aruba Juniors.
Pul B.
Los Amigos Kòrsou.
Astros.
Surprise.
Skema.
Djasabra 18 mart 2023.

09:30 Glovers vs Aruba Juniors.

11:15 Astros vs Surprise.

13:00 Stars Bonaire vs Glovers.

14:45 Los Amigos Kòrsou vs Astros.

16:30 Tigers vs Boomerang.

Djadumingu 19 mart 2023.

09:30 Aruba Juniors vs Stars Bonaire.

11:15 Surprise vs Los Amigos Kòrsou.

13:00 2nd Pul A vs 2nd Pul B.

14:45 1st Pul A vs 1st Pul B.

16:30 partido Liga 50.

Pabien na e ekiponan ku a kai den premiashon di e torneo.

Zorg en Jeugd Caribisch Nederland
Ministerie van Volksgezondheid,
Welzijn en Sport

Formulario di Inskripshon - Kambio Seguro di Kuido

Personal Data
Genero: ☐ h.h. ☐ h.m.
Nòmber: (kompleto)
Fam (fam di soltera hende muhé kasá)
Number di sedula
Fecha di nasementu (dd/mm/aaaa)
País i lugá di nasementu
Number di dòkter di kas nobo
Adres

☐ Inskripshon ☐ Kambio

Kambia dòkter di kas?

Bo mag di skohe!

Bon kuido ta nifiká hasi e eskohonan korekto. Tambe ora ta trata di bo dòkter di kas! Na Kuido i Hubentut Hulanda Karibense (ZJCN) bo por kambia di dòkter di kas entrante 1 di aprel.

Kiko bo mester hasi?

Informá serka e dòkter di kas nobo si e tin espasio pa bo komo pashènt nobo. 'Download' e formulario di registrashon riba www.zvkc.nl.

Bo por yama tambe (715 8899) òf meil na

info@zorgverzekeringskantoor.nl pa e formulario.

Despues yena e kambio riba e formulario i entregá esaki **promé ku 1 di aprel** na ZJCN, Kaya Grandi 91.

Konfiabel, hustu i aksesibel, esei nos ta sigurá bo!

Payroll Pro
HRM

www.payrollprohrm.com

The most complete payroll and HR software in the Caribbean!

Download the mobile app!
GET IT ON Google Play | Download on the App Store

Flor di Coromoto 36 aña



Kor Flor di Coromoto a selebrá 36 aña di eksistensia. Gregory Goedgedrag a funda e kor aki. Un bon fundeshi.



Video Projector
3800 Lumens

\$749

Gaming Portable
Hard Drive

\$85



We have the hottest gaming consoles
& accessories!



**BEST
WARRANTY
& SUPPORT
ON BONAIRE**



\$195

32" HD Smart TV

JBL 2.1 Soundbar
w/ Wireless Soundwoofer

\$199

